

**Thursday, April 9, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**PROJECT SERVE SAFE FOOD**

Health & Family Welfare Dept Food and Drugs Administrationchuan Nestle India leh National Association of Street Vendors of India NASVI te tangkawpin Project Serve Safe Food Training vawiin khan Aizawlah an buatsaih a, Aizawl leh a chhehvela kawng kama ei leh in zuartu Street Food Vendor mi 100 thlan chhuahte hnenah training pek a ni a, Mizorama a vawi khatna a ni .

He training hi Food Safety Commissioner Pi K. Lalrinzuali a hmanpui a, kawng kama thil zuarte pawimawhna leh zin mite leh hnam dang laka ram hmel pholangtu an nih dan te a sawi a. Vawi khat ei siam dan dik lovin nghawng a neih thui dan leh fimkhur a ngaih dante tarlangin, training chhim tura thlan chhuah an ni chu lawmawm atih thu a sawi a, an thil zir chhuahte a taka hman tangkai chhunzawm nghal turin a fuih bawk.

Nestle India leh NASVI chuan kum 2016 khan Street food Vendor te mumal zawka training pe turin thawhhona an duang a. He training paltlang te chu FSSAI atangin Food Safety Training and Certification Certificate pek an ni bawk. State tina Food Safety Department te nena tang hovin hetiang training hi an buatsaih thin a ni. He Project, Serve Safe Food Training hi state 30-ah buatsaih tawh niin Street Food Vendor mi sing 9 & 2862 train chhuah tawh an ni.

Trainer-te hi NASVI mi leh sa te niin, training a kalte hi an dawra an inthamna tur leh hmanrua Hygiene Kit bakah Training Certificate te hlan vek an ni bawk.



**VC PRESS CONF**

Mizorama VC ten khawtlang hmasawna tur atana hnathawhna tur, 15th Finance Commission in Mizoram tana RLB Grants a ruahman zawng zawng cheng nuai 36,200 chu a hun chhungin an hmu vek thei tih sawiin Mizoram sawrkar chungah an lawm takzet an ti.

Vawiina Aizawl Press Club-a thuhthar thehdarhtute an kawmnaah, All Mizoram Village Council Association (AMVCA) President Pu FP Laikhama chuan he thu hi sawiin, VC ten khawtlang hmasawna tur atanga 15th Finance Commission in Mizoram RLB Grants dawn tur a ruahman 2021 – 2026 chu a sum fai zawngin cheng nuai 36,200 a ni a ti a. 15th FC hnuai RLB grants sum dawn tawp ber na tur hi 15th FC period hun chhung ngei, kumin March ni 28 khan a bo a bang awm lovin Mizoram chuan a dawng kim a ti a. A bo a bang awm lova an hmuh theih nana Mizoram sawrkar hmalakna chu fakawm an tih thu sawiin, Sawrkar in a thuneihna semzai a ram hmasawna tur a to bul ber thingtlang hmasawna a ngai pawimawh

leh party hrang hrang atanga VC-te pawh thlei bik awm lova an chanvo ang theuh hmu a hmasawnna tur sum rualkhai taka hmuh a ni chu lawmawm an ti hle a ti.

### **Byte: AMVCA President**

Hei bakah hian AMVCA President chuan kum 2011 hnua Village Council-te lawmman tihpun tur leh VC-ten sawrkar hotute dawra Aizawl an kal chang a, an thlenna tur hmun, VC Khualbuk an neih theih nan sorkarin hma an lak mek avangin lawmawm an tih thu an sawi.



### **MUHCS**

Kum 2025-26 chung khan Mizoram Universal HealthCare Scheme (MUHCS) hnuaiah mi nuai 6, sing 6, sang 3, 934 an inziak lut a, an zinga mi sing 2, 198 te chu mi nawlpui man chawia inziaklut, Contributory beneficiary te an ni.

Akashvani News Aizawl thudawn danin, kum 2025 April thla atanga kumin 2026 January thla inkar khan MUHCS hnuaiah mi nawlpui (Contributory beneficiary) te thawhkhawm zat chu cheng vbc 6, nuai 54, sing 5, sang 9, 899 niin an inenkawlna senso sorkar in a pek zat chu cheng vbc 37, nuai 46, sing 4, sang 1,412 a ni a.

Hemi hun chung vek hian AB PMJAY Golden Card siam mi nuai 5, sing 9, sang 8, 175 awmin an inenkawlna bill sorkarin a pek zat chu cheng vbc 60, nuai 79, sing 3, sang 1,231 a ni a. Sawrkar hnathawk inziak lut zat chu mi sing 3, sang 5, 325 niin, an hlawh atanga contribution tlingkhawm zat chu cheng vbc 16, nuai 77, sing 5, sang 8,200 a ni a, an inenkawlna bill sorkarin a pek zat chu cheng vbc 43, nuai 81, sing 6,957 a ni a. Pensioner inziaklut mi sing 1, 236 awmin, an thawhkhawm zat chu cheng vbc 8, nuai 51, sing 5, sang 1, leh 10 niin, an inenkawlna senso Bill zat chu cheng vbc 29, nuai 49, sing 9, sang 7,717 a ni.

